

- प्रदेश मांय कोचिंग संस्थानां री कथित मनमानी माथे रोक लगावण सारू कोचिंग सेंटर नियंत्रण और विनियमन बिल विधानसभा मांय पास व्ह्यो।
- चिकित्सा विभाग अर गैर-सरकारी अस्पतालां रा नुमाइंदां बीचे बातचीत पाछे आरजीएचएस सेवा ओजू बहाल करीजी।
- प्रदेश मांय लगातार व्हे रही बिरखा ऊं केई ठोडां पाणी भर्यो- आबादी रा मोटा हलका माथे असर पड़्यो।
- सुसमा अभियान रा तैत राज्य रा 19 जिलां रा अढाई लाख विद्यार्थियां ने सड़क सुरक्षा एम्बेसेडर बणाया जा रह्या है।

000

विधानसभा आज कोचिंग सेंटर नियंत्रण अर विनियमन बिल पास कर दीनो। उपमुख्यमंत्री अर उच्च अर तकनीकी शिक्षा मंत्री डॉ. प्रेमचंद बैरवा बिल पेश कीनो। ओ बिल पास व्ह्या पाछे कोचिंग संस्थान विद्यार्थियां ऊं मनमानी फीस नी ले सकेला। डॉ. बैरवा एक सवाल रा जवाब मांय सदन ने जाणकारी दीनी के राज्य मांय बेगी ई मोटर व्हीकल एग्रीगेटर पॉलिसी लाई जावेला। सड़क परिवहन अर राजमार्ग मंत्रालय री ओर ऊं लारला दिनां जारी करीजी गाइड लाइन रे मुताबिक राज्य सरकार ई नीति माथे काम कर रही है। वे प्रदेश रा लाइसेंसशुदा एग्रीगेटर्स ऊं मिली जाणकारी रे अनुसार सार्वजनिक परिवहन सारू कैब कम्पनियां रो जिलेवार ब्यौरो ई दीनो। विधानसभा मांय राजस्थान स्वास्थ्य विज्ञान विश्वविद्यालय संशोधन बिल 2025 ई पास करी ज्यो। संसदीय कार्यमंत्री जोगाराम पटेल खबरनवीसां सागे बातचीत करता थकां कह्यो के चिकित्सा सेवावां ने बेहतर बणावण सारू जरूरी जतन कर्या जावेला।

000

इण ऊं पैली स्मार्ट मीटर रा मुद्दा माथे सदन मांय जोरदार हंगामो व्ह्यो।

000

मुख्यमंत्री भजनलाल शर्मा आज कृषि, बागवानी, पशुपालन अर गौपालन विभाग रा अहलकारां सागे मीटिंग कर र महकमा रा कामकाज रो जायजो लीनो। वां रा दफ्तर मांय राख्यी ज्यी मीटिंग मांय श्री शर्मा बजट मांय करी ज्यो ऐलाण ऊं जुड़्या कामां रा बारा मांय दिशा-निर्देश दीना। ई दौरान वे राजस्थान किसान आयोग रो अंतरिम प्रतिवेदन ई जारी कीनो।

000

प्रदेश री 12 कृषि मण्डी समितियां मांय 43 करोड़ 87 लाख रुपया ऊं बत्ता खर्च ऊं विकास रा काम कराया जावेला। मुख्यमंत्री भजनलाल शर्मा ई बाबत मंजूरी दे दीनी है। ई रा तैत सोजतसिटी, चौहटन, डीडवाना, जैतारण, बड़ी सादड़ी, डग, बालोतरा, केशोरायपाटन, हिंडौन, भगत की कोठी अर अजमेर री फल-तरकारी अर अनाज मण्डी समितियां मांय आरकम आवता तीन बरस मांय खर्च करी जावेला। मुख्यमंत्री ई सागे ई झालरापाटन, जालौर अर सीकर समेत नौ मण्डियां सारू ई करीब 26 करोड़ रुपया मंजूर कीना है। ई रकम ऊं मण्डियां मांय बिजली ऊं जुड़्या, यार्ड बणावण अर सम्पर्क सड़कां रा काम कराया जावेला।

000

प्रदेश रा गैर-सरकारी अस्पतालां मांय आरजीएचएस सेवा तुरत सरू व्हे गयी है। चिकित्सा अर स्वास्थ्य विभाग री प्रमुख सचिव अर आरएसएचए रा मुख्य कार्यकारी अधिकारी री ईलाज रा हलका रा नुमाइंदा सागे मीटिंग पाछे आरजीएचएस रा तैत बिना नकदी मुहैया करायी जावण वाळी सेवावां पैली री भांत ओजू सरू व्हे गयी है। ध्यानजोग है के गैर-सरकारी अस्पताल 25 अगस्त ऊं आ सेवा बंद कर दीनी ही, जिण ऊं राज्य रा लाखां कर्मचारियां अर वां रा पिरवार वाळां ने गैर-सरकारी अस्पतालां मांय ईलाज नी मिल रह्यो हो। विभाग री प्रमुख शासन सचिव गायत्री राठौड़ बतायो के आज संवारे आरजीएचएस ऊं जुड्या अस्पतालां रा नुमाइंदा सागे व्ही चर्चा पाछे अ सगळा अस्पताल आरजीएचएस रा तैत सेवा सरू करण सारू राजी व्हे गया।

000

राजस्थान स्टेट हेल्थ इंश्योरेंस एजेंसी रा मुख्य कार्यकारी अधिकारी हरजीलाल अटल बतायो के गैर-सरकारी अस्पतालां रा बिलां री बाकियात रा चुकारा रो काम तेज कर्यो जावेला। ई सागे ई सीजीएचएस री भांत आरजीएचएस री रेट मांय बदलाव सारू ई जांच करायी जावेला। श्री अटल बतायो के योजना रा न्यारा-न्यारा नियमां मांय जरूरी सुधार सारू संयुक्त समिति बना दीरीजी है जिण री राय रे मुजब योजना मांय नीतिगत बदलाव कर्या जावेला।

000

प्रदेश मांय आवता तीन-चार दिन कोटा, उदयपुर, भरतपुर, अजमेर अर जयपुर संभाग मांय कठे-कठे भारी ऊं घणी भारी बारिश व्हेवण रा आसार है। मौसम विभाग केई ठोडां मझला ऊं तेज दर्जा री बिरखा री संभावना ई जतायी है। जोधपुर अर बीकानेर संभाग रा कुछ हलकां मांय 5 सितम्बर ऊं बारिश ओजू तेज व्हेवण रा आसार है। ई बीचे आज ई पाली, सवाईमाधोपुर, करौली, बांसवाड़ा अर राजधानी जयपुर समेत केई ठोडां मेह बरस्यो। कोटा जिला रा कनवास अर आरे-सारे रा हलकां मांय काल ऊं व्हे रही बिरखा ऊं अरू नदी मांय पाणी उफण रह्यो है। म्हाणा खबरनवीस बतायो के कनवास मांय बाढ़ सरीखा हालात ऊं केई गेला बंद व्हे गया है।

000

सवाईमाधोपुर अर आरे-सारे रा हलकां मांय आज रूक-रूक र मेह बरस्यो। पाली मांय दोपहरां पाछे जोरदार बरसात व्ही। ई बीचे जिला रा हेमावास बंधा मांय पाणी रो रिसाव बंद कर दियो ज्यो है। डूंगरपुर मांय ई झमाझम मेह बरस्यो। सलूम्वर मांय रिमझिम बारिश व्ही। प्रदेश मांय लगातार व्हे रही बिरखा ऊं केई ठोडां पाणी भर गयो। प्रशासन अर आपदा प्रबंधन री टीमां हालात माथे नजर राख रही है। राजधानी जयपुर मांय जिला कलेक्टर जितेन्द्र कुमार सोनी जरूरत रा हिसाब ऊं नागरिक सुरक्षा स्वयं सेवकां री तैनाती रा हुकम दीना है। वे एस.डी.ओ., तहसीलदारां अर प्रशासनिक अहलकारां ने मौके पूग र हालात रो जायजो लेवण अर राहत सारू साधनां री उपलब्धता तैय करण बाबत् कह्यो।

000

प्रधानमंत्री नरेन्द्र मोदी आज नई दिल्ली मांय सेमीकॉन इंडिया 2025 रा दूजा दिन सेमीकंडक्टर हलका रा जाणकारां सागे बातचीत कीनी। वे प्रदर्शनी ने निरखी अर सेमीकंडक्टर ऊं जुड्या न्यारा-न्यारा सामान अर परियोजनावां ने देखी। इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव ई प्रधानमंत्री सागे मौजूद रह्या। श्री मोदी सेमीकॉन इंडिया रा सीईओ गोलमेज सम्मेलन मांय ई शिरकत कीनी। ई सम्मेलन रो मकसद वैश्विक सेमीकंडक्टर आपूर्ति श्रृंखला मांय भारत ने भरोसेदार भागीदार रा तौर ऊं सामी लावणो है।

000

वित्तमंत्री निर्मला सीतारमण री सदरत मांय जीएसटी परिषद री मीटिंग नई दिल्ली मांय आज सरू व्ही। दो दिन री ई मीटिंग रो खास मुद्दो जीएसटी री टेक्स स्लैब मांय बदलाव कर र मौजूदा चार स्लैब री बजाय दो स्लैब करणो है। केंद्रीय वित्त राज्यमंत्री पंकज चौधरी अर केई राज्यां रा मुख्यमंत्री ई इण मांय शामिल व्हे रह्या है।

000

केन्द्रीय सड़क परिवहन अर राजमार्ग मंत्री नितिन गडकरी कह्यो है के सरकार देश मांय बुनियादी ढांचा ने मजबूत करण अर शहरी सम्पर्क मांय सुधार करण माथे खास ध्यान दे रही है। वे आज नई दिल्ली मांय राख्यी ज्यी परामर्श कार्यशाला मांय बोल रह्या हा। कार्यशाला मांय शहरी हलकां मांय भीड़ कम करण सारु रिंग रोड़ अर बाइपास बणावण रा बारा मांय चर्चा करीजी। रिंग रोड़ अर बाइपास बणावण ऊं शहरी हलकां रा नियोजित विकास ने बधावो मिलेला। कार्यशाला मांय केन्द्रीय राज्यमंत्री अजय टमटा, हर्ष मल्होत्रा, मंत्रालय रा आला अहलकार अर नगर आयुक्त शामिल व्ह्या।

000

प्रदेश मांय चलाया जा रह्या सुरक्षित सड़क मार्ग—सुसमा अभियान रा तैत विद्यार्थियां मांय जाग जगायी जा रही है। 11 अगस्त ऊं सारु व्ह्यो ओ अभियान 15 सितम्बर ताई चालेला।

000

केन्द्रीय जनजाति कार्यमंत्री जुएल ओराम रो काल कोटा पधारण रो कार्यक्रम है। वे आदिवासी जनजातीय गौरव सम्मेलन मांय शामिल व्हेला। वां रो जय मीनेश आदिवासी विश्वविद्यालय मांय राख्या जावण वाळा जळसा मांय अर दूजा कार्यक्रमां मांय ई शामिल व्हेला।

000